

焦太史編輯國朝獻徵錄

焦太史編輯國朝獻徵錄卷之二目錄

宗室二

唐王世傳

唐成王

唐恭王

三城康穆王

承休昭毅王

輔國將軍字浹

郢王世傳

伊王世傳

虞王

吳王

衡王

徐王

建文君太子

建文君少子

漢庶人

趙王世傳

趙康王

鄭王世傳

靳王

越王

襄王世傳

襄憲王

襄陽榮肅王

荆王世傳

荆端王

富順王

樊山溫懿王

恭裕王

淮王世傳

滕王

梁王世傳

衛王

榮王

許王

德王世傳

秀王

崇王世傳

忻王

吉王世傳

徽王世傳

懷獻太子

悼恭太子

岐王

益王世傳

益莊王

衡王世傳

新樂王

雍王

壽王

汝王

涇王

榮王世傳

申王

蔚王

安王

哀冲太子

莊敬太子

景王

穎王

戚王

薊王

均王

憲懷太子

靖王

潞王

大都督朱文正

靖江王世傳

靖江安肅王

四明趙昌期

吳興茅元儀 同校

錢唐徐象樞刊行

目錄畢

焦太史編輯國朝獻徵錄卷之二

宗室二

唐王傳

唐王極母李賢妃洪武二十四年封永樂六年建國南陽十三年卒謚定子瓊經永樂十九年嗣宣德元年卒謚靖妃高氏未冊而王卒自經死追封唐王妃靖王世子芝 卒弟瓊烜宣德三年嗣成化十一年卒謚憲世子芝 先卒謚悼簡無子弟芝址成化十三年以舞陽王嗣王二十三年卒謚莊子彌錡以穎昌王嗣王嘉靖二年卒謚成無子弟文成王彌鉗之

子宇溫嘉靖四年嗣王贈父唐恭王二十一年宇溫  
獻金千兩銀萬兩助建 太廟賜玉帶一歲加祿二  
百石五學編三十九年卒諡敬子宙祿封世子四十一  
年嗣四十三年卒諡順子碩熿隆慶三年封世子五  
年嗣編執錄

唐成王彌諦

唐成王彌諦莊王之子也篤行博學工詩繪而善敦  
睦弘治二年嗣爵 孝宗皇帝嘗賜王五經子史諸  
籍王廣置精廬國中集學徒備秀者資給之使肄業  
武宗朝嘗上疏以用賢圖治爲言時 車駕數喜遊

幸王作憂國詩八章以諷晚年詩繪益精行草皆稱  
妙品著甕天小稿并家教若干卷嘉靖二年薨弟文  
城恭靖王彌鉗亦工詩善草隸著宗訓直言謙光堂  
集秋江詞若干卷

唐恭王彌鉗

唐恭王彌鉗莊王之子成王之弟也幼而溫良長乃  
碩茂好讀書書初讀卽舉其要凡古今事變及百家  
諸子遠邇洪纖靡不究竟早受王封就第時莊王  
及母妃方康疆臨國王旦日入內侍膳問安歷寒  
暑不輟父王妃母甚愛之兄成王嗣封王事奉



恭謹且友恤諸弟悉得歡心爲 成王及諸宗室所

重有國事涉疑難者咸就王商確王立剖分咸中肯綮正德辛未間河南北盜起勢逼南陽南陽震驚王一一指授府衛官方畧兵戎整飭防禦戒嚴賊聞遁去宛民賴安後 莊王及母妃病輒徬徨左右籲天泣禱沒之日極其哀毀殯則途步三十餘里呼號不絕口王教諸子有義方每爲擇嚴師講讀諸子皆檢訪自勵穎哲茂成平生雅尚儉素不喜華美宗人有以千金飾裘馬買名姝者王中憎之若將浼焉日惟與文士觴詠自樂晚年廣置園囿雜蒔花竹構謙光

諸亭曰吾非耽樂乃以待賓友燕宗室相與娛暮景  
爾用是大夫士過南陽未有不造門求見者書工隸  
草詩尚氣格日廣所聞頓超名輩每對客揮筆一韻  
輒至數十首自號秋江叟嘗咏秋江末句云霜後水  
痕清徹底呼童整頓釣魚竿蓋托此寓興云

三城康穆王芝堦

三城康穆王芝堦唐憲王子也成化七年冊封王博  
通羣經尤嗜繪事法書名畫未嘗一日去手弘治一  
年勅賜五經四書管御書樓玩易洞正德二年冬  
王以命服經久狹短不堪服用疏乞更賜禮官以

今典無更賜郡王冠服例 詔報罷正德六年薨著  
進修稿若干卷所作者英王母九老百花諸圖皆妙  
絕一時

承休昭毅王彌振

承休昭毅王彌振榮和王子也性警敏絕人喜儒雅  
而善決斷嘗彙古法書名曰復齋集古法帖若干卷  
李夢陽贈之詩曰至人閒後學君子篤前聞所著存  
稿樂府復齋錄十餘卷嘉靖二十一年唐敬王以王  
行誼上聞 璽書褒之命未下而王薨長子宇淵嗣  
爵淵子宙枝亦好學識典故著 皇明統宗繩螿錄

輔國將軍宇泱

輔國將軍宇泱新野王諸孫也五歲喪明從師氏晝  
掌識文字而耳授書日記千言久之博通羣籍尤精  
太乙壬遁曆數方技宦游諸大夫爭造門問奇又多  
習 國家典故嘉靖庚子陳便宜數十事書上未報  
著名獻錄辯疑碑各一卷唐成王以摩天王目之子  
宙松力舉千斤而好劔嗜書慕古節俠廉義之風不  
逐時靡松子碩爌字孔炎封鎮國中尉博雅慷慨工  
文辭益弘家學與其子器封並以詞名震耀海內號  
南陽父子萬曆戊子吏科給事中張應登疏諸藩文

行堪宗正者周則安胤勤煠勤炘趙則載埜載堆載  
坑襄則載埜載幸楚則英煠南昌則多煠多炘多烽  
多斨於唐則孔炎父子論者榮之孔炎著巨勝園集  
友聲集各十卷五色石一卷器封著宛志畧崇游集  
而詩尤驚奇

潘獻志

郢王 皇子楠

郢王棟母劉惠妃洪武二十四年封安陸二十七年  
治邸墾田成之國在國六年卒謚靖無子國除留內  
外官校守國供王祀妃郭氏武定侯英女王卒踰月  
妃痛哭曰賢王舍我去我寡婦也無子尚誰恃對鏡

寫容付官人又痛哭曰候吾諸女長令識母容也遂  
自經卒王四女宣德四年梁王之國移官人居南京  
令諸郡主議婚舊國賜第南京太監王景弘資給女  
封光化穀城南漳郡主歲加祿各八百石一天鄧王  
弟伊王伊王弟楠楠於諸子中最少洪武二十六年  
十二月生未逾月而卒

五百字  
編

伊王櫛傳

伊王櫛母葛麗妃洪武二十一年生永樂六年之國  
河南歲祿僅二千石卒謚厲子顯煥嗣請選宮人不  
許令選之護軍家酬直勿抑勒卒謚簡子勉塋正統  
八年封上洛王嗣王天順八年卒謚安子諱銳成化  
二年嗣十一年卒謚悼季弟諱鏗成化四年封郟城  
王十二年嗣王正德三年卒謚定子訐淵弘治三年  
封世子正德六年嗣嘉靖五年卒謚莊弟訐淳弘治  
六年封濟源王嘉靖六年嗣王訐淳言祿薄先朝乞  
得河南鏹鈔五萬七千七百貫准祿米八千嘉靖八

年革諸王請乞稅租田湖伊府課鈔亦在革中乞補  
祿戶部言伊祿二千石通給本色 英宗加米五百  
石 憲宗又加麥一百五十石課鈔本成化弘治正  
德年請乞非永樂以前欽賜比況河南一省諸王缺  
祿八十餘萬不許二十一年卒諡 子典模以世子

嗣王

晉學  
錄

四十二年有罪廢爲庶人送發高墻削除世封籍沒  
財產國除先是以府第卑隘請移官署以通風水不  
允厥後累辱有司酷擾百姓重建府第增廣墻垣築  
有迎仙臺百花臺四季亭石庫擁翠坊玉虬噴雪坊



乘風禦氣樓小團殿鴛鴦殿騰光殿洞天小景清和  
宮懷春宮頤養宮世嗣宮峻絕輝煌侔於帝闕上  
令改正不聽河南撫按暨科道劾其僭倣恣肆稔惡  
怙終五違祖訓三抗明旨世宗下法司勘問明白遂  
正厥辜子安樂王褒熾亦廢安置開封

續登  
錄

虞王傳

虞王雄英懿文太子長子洪武十五年五月巳酉朔卒追封虞王謚懷葬鍾山令侍臣素服步送

吾學編

吳王傳

吳王允頹建文君弟懿文太子第三子洪武十年十一月生三十一年封杭州未之國建文四年七月靖難後降封廣澤王居福建漳州是年九月召還京以不能諫正建文君降庶人永樂十三年卒 英宗復辟出吳庶人居鳳陽者但有庶母姊姪老婦五六人時年八十矣

吾學編

衡王傳

衡王允燧洪武三十一年封未之國建文四年七月  
降封懷恩王居江西建昌是年同吳王召還京廢爲  
庶人

吾學編

徐王傳

徐王允熙洪武二十四年六月生生八年而封未之  
國建文四年七月降封敷惠王隨母呂太后居太子  
陵永樂二年改封甌寧王奉太子祀未遣之國四年  
二月邸中忽火起驚仆地卒年十六謚哀簡

吾學編

建文君太子傳

太子文奎洪武二十九年十月晦生 上曰十月晦  
月日皆終不喜三十一年建文君卽位立爲皇太子  
靖難兵入京年七歲矣莫知所終

吾學編

建文少子傳

少子文圭建文三年生生二歲建文君遜位靖難後  
號爲建庶人者是也幽中都廣安宮 英宗復辟憐  
庶人無罪久繫禁欲寬庶人李賢贊曰堯舜心也請  
於 太后出於鳳陽歲給薪米聽婚娶出入自便又  
與閹者二十人婢妾十餘人給使令遣奄牛玉入禁  
諭庶人庶人伏地頓首謝且喜且悲有阻議者 上  
曰有天命任自爲之庶人入禁時纔二歲年五十六  
七始出鳳陽不識牛馬世傳 成祖入宮時建文君  
有幼子老嫗教之牽 成祖衣哭跪前求食曰孩兒

餓矣饑殺孩兒矣 成祖亦哭曰汝生帝王家有饑  
死理命善撫之不知此建文君第幾子抑卽太子少  
子也或曰牽衣哭者 成祖育諸宮中未詳

五口學編



漢庶人傳

漢庶人高煦 成祖第二子初 太祖召秦晉燕周四世子及庶人輩學於京師顧不肯學日游嬉輕躁無行建文卽位初 仁宗及庶人奔喪京師舅氏魏國公徐輝祖密戒之不聽盜輝祖馬不朝辭渡江走歸途中輒殺民吏至涿州又殺驛丞其凶橫淫荒狡黠險狠跋扈不可御久矣靖難兵起 仁宗居守庶人有膂力善騎射從行頗有功江上之戰靖難兵稍却庶人適引胡兵至戰勝已而議建儲藩府舊臣洪國公丘福駙馬王寧善庶人時稱二殿下功高 成

祖曰居守功高於扈從儲貳分定於適長且元子仁  
賢真社稷主汝等勿復妄言永樂二年立東宮封庶  
人漢王國雲南快快不肯去曰我何罪斥我萬里改  
青州又快快不肯去曰我何罪置我瘠土留京師又  
請得天策衛爲護衛曰唐太宗天策上將吾得之豈  
偶然又益請兩護衛曰我英武豈不類秦王 成祖  
狩北平庶人益不法陰蓄壯士肆出盜劫兵馬指揮  
徐野驢擒之庶人怒手鐵爪撻殺徐指揮衆莫敢言  
遂僭用天子車服十四年 成祖狩北京聞不豫逆  
謀益著 成祖聞之怒促駕南還召庶人褫冠衣囚

繫西禁門條其罪惡數十事且誅之 仁宗頓首伏地涕泣力救久之削兩護衛誅其左右狎暱徒封樂安州促卽日行 成祖顧謂東宮及太孫曰樂安近北京卽聞變朝發可夕擒至樂安怨望異謀益急

東宮數書戒竟不悛 成祖北征晏駕庶人子瞻圻在北京凡 朝廷事潛遣人馳報一晝夜六七行庶人日亦數十遣人入潛伺京師幸有變 仁宗固知之願益厚遇書召至倍加歲祿賜資萬計先是瞻圻憾父殺其母屢發父過惡 成祖曰爾父子何忍也至是庶人悉上瞻圻前後覘報中朝事又曰廷議曰

夕發兵取樂安 仁宗召示瞻圻曰汝處父子兄弟

間讒構至此穉子不足誅遣鳳陽守 皇陵二十二

年十月封庶人嫡子瞻坦爲漢世子次瞻空濟陽王

瞻域臨淄王瞻埤昌樂王瞻澤淄川王瞻坪齊東王

瞻埽任城王瞻垠海豐王瞻邶新秦王未幾 仁宗

大漸 宣宗自南京奔喪卽位賜二叔視他府特厚

庶人日有請及言朝政 上曲徇其意索駝與之駝

四十索馬與之馬百二十索袍服又與之袍服庶人

益自疑宣德元年八月壬戌朔遂反遣枚青潛來京

約英國公張輔內應輔暮夜繫青聞於朝又約山東

都指揮靳榮等反濟南爲應又散弓刀旗令真定諸  
衛所盡奪傷郡縣畜馬立五軍都督府指揮王斌領  
前軍韋達左軍千戶盛堅右軍知州朱恒後軍諸子  
各監一軍庶人率中軍世子瞻垣居守指揮韋弘韋  
興千戶王玉李智領四哨部署已定僞授王斌朱恒  
等太師都督尚書等官御史李濟樂安人棄其家變  
姓名間道詣京上變言庶人刻日取濟南然後率兵  
犯闕陞濟行在左僉都御史遣中官侯泰賜書庶  
人言昨枚青來言叔督過朝廷于不信皇考至  
親惟二叔子所賴亦惟二叔小人離間不得不敷露

中懇且傳播驚疑或有乘間竊發者不得不畧爲之  
備惟叔鑒之泰至樂安庶人盛兵見泰傲倨不拜勅  
南面坐跪泰大言曰永樂中信讒削我護衛徒我樂  
安 仁宗徒以金帛弭我今又輒云 祖宗舊制殊  
令我鬱鬱豈能久居此汝試觀我士馬豈不橫行天  
下汝歸報急縛奸臣來徐議吾所欲泰懼唯唯還

上問庶人何言對無所言又問庶人治兵何如對無  
所見 上曰泰二心已而錦衣官從泰往者具陳所  
見 上大怒泰是月丁卯庶人遣百戶陳剛進疏言  
仁宗違洪武永樂舊制與文臣誥勅封贈今修理

南巡席殿等事爲 朝廷過斥二三大臣夏原吉等  
爲奸佞並索誅之又書與公侯大臣驕言巧詆汙讒  
乘輿 上嘆曰庶人果反立召張輔諭親征輔對  
曰庶人素怯懦今所擁非有謀能戰者願假臣兵二  
萬擒獻 闕下 上曰卿誠足擒賊願朕新卽位小  
人或懷二心行決矣令大索樂安奸謀乙丑 勅遣  
指揮黃謙同總兵平江伯陳瑄防守淮安勿令賊南  
走令指揮芮勛守居庸關令法司盡弛軍旗刑徒從  
征戊辰命定國公徐景昌彭城伯張昶守 皇城安  
鄉伯張安廣寧伯劉瑞圻城伯趙榮建平伯高遠守

城已巳命豐城伯李賢侍郎郭璉郭敦李昶督軍餉  
命鄭王瞻埈襄王瞻墿留守北京廣平侯袁容武安  
侯鄭亨都督張昇山雲尚書黃淮黃福李友直協守  
輔少師蹇義少傅楊士奇少保夏原吉太子少傅楊  
榮太子少保吳中尚書胡濙張本通政使顧佐扈行  
陽武侯薛祿爲先鋒辛未發京師癸酉過楊村馬上  
顧問從臣曰試度庶人計安出或對曰樂安城小彼  
必先取濟南爲巢窟或對曰彼曩不肯離南京今必  
引兵南去 上曰不然濟南雖近未易攻聞大軍至  
亦不暇攻護軍家在樂安不肯去此往南京庶人外



多誇詐內實懦怯臨事狐疑展轉不能斷今敢反輕  
朕少年新立衆心未附又謂朕不能親征卽遣將來  
得以甘言厚利誘餌幸成事今聞朕行已膽落敢出  
戰乎至卽擒矣戊寅獲樂安歸正人益知賊中虛實  
言賊初約靳榮取濟南山東布按二司官覺之防榮  
不得發又聞大軍至不敢出朱恒應天人力言宜引  
精兵趨南京得南京大事成矣衆不從曰爾願得赴  
家柰我輩何又曰庶人初聞陽武侯等將兵攘臂喜  
曰此易與及聞親征始懼於是授歸正人官厚賞  
給榜令還樂安諭衆上仍書諭庶人曰張敖失國

本之貫高淮南受誅成於伍被今六師壓境王卽捨  
獻倡謀者朕與王除過恩禮如初不然一戰成擒或  
以王爲奇貨縛來獻悔無及矣 上英暢神武詞旨  
明壯我師氣盛龍旗鉦鼓千里不絕庚辰 馳奏前  
鋒至樂安庶人約明日出戰 上令大軍蓐食兼行  
文大臣請慎重武大臣口林莽間或設伏百里趨利  
不可 上曰兵貴神速我抵城下營彼阱中虎爪牙  
安施大軍至烏合之衆方洶洶何暇設伏遂行夜分  
至陽信時慶雲陽信吏人皆入樂安城無一來朝者  
辛巳昧爽駐蹕樂安城北城中黑氣黯黯我兵壁其

四門賊乘城舉砲我軍發神機銃箭聲震如雷城中  
股慄諸將請卽攻城上不許勅諭庶人再遣勅皆  
不答圍中人多欲執獻庶人者庶人密遣人詣行  
幄願假今夕訣妻子明日出歸罪上許之是夜庶  
人盡焚兵器及通逆謀書壬午移蹕樂安城南庶人  
將出城王斌等力止曰寧一戰死無爲人擒庶人給  
斌等復入宮遂潛從間道出見上羣臣請正典刑  
不允以劾章示庶人頓首言臣罪萬萬死惟陛下  
命上令庶人爲書召諸子同歸京師赦城中罪止  
同謀脇從者不問遂執王斌等下行錦衣獄癸未令

祿尚書張本鎮撫樂安改樂安爲武定八月乙酉班  
師 命中官頌繫庶人父子赴北京錦衣械繫王斌  
朱恒盛堅典仗侯海長史錢巽教授錢常至京皆伏  
誅惟長史李默以嘗諫免死謫口北爲民誅榮榮子  
義天津鎮守都督孫勝山西都指揮張傑楊雲青州  
左衛指揮使 誠滄州衛指揮鄭典皆約舉城應者  
先納軍馬糧仗數事覺相繼誅六百四十餘人其故  
縱與藏匿坐死戍邊者一千五百餘人編邊氓者七  
百二十人初庶人被執鎖繫逍遙城一日 上欲往  
視左右止之不聽及至熟視久之庶人出不意伸一

足勾 上仆地左右亟扶起亟命壯士舁銅缸覆之  
缸約重三百斤庶人有力項負之輒動積炭缸上如  
山然炭逾時火熾銅鎔庶人死諸子並死

吾學編

趙王高燧傳

趙王高燧 成祖第三子永樂元年封漳德洪熙元年就國王負靖難功密與漢庶人謀奪嫡時時譖東宮傷其官寮繫獄多死者永樂二年居守北京信用邪說恣行不法七年 上聞之大怒誅其長史顧晟褫王衣冠 東宮力解得免擇國子司業趙亨道董子莊爲長史二人能輔導王稍改行二十一年五月 上不憚護衛指揮孟賢等結曆官王射成及內侍養子造僞詔俟 晏駕詔從中下立趙王總旗王瑜有姻家高以正者爲賢等畫此謀謀定告瑜瑜上

變告 上曰豈應有此立捕賢得所造詔誅賢射成  
以正及內侍諸養子升瑜遼海衛千戶王大懼又稍  
稍斂戢 仁宗卽位加漢趙二王祿歲二萬石通前  
三萬石封王長瞻堦爲趙世子次瞻塙爲安陽王  
宣宗初卽位賜田園八十頃漢庶人反誅班師至單  
橋陳山迎 駕遂言曰趙王與漢庶人逆謀久矣今  
宜藉此兵威移指彰德擒趙王否趙亦反側不自安  
異日復勞 聖慮 上不聽楊士奇亦以爲不可山  
又請尚書蹇義夏原吉言方畧邀二人共請 上意  
不忍曰 先帝愛二弟漢王自絕於天朕不敢赦趙

王反形未著朕終不忍負先帝也高煦至京又言嘗遣駱指揮阮內使與趙通謀上以漢庶人詞羣臣章遣廣平侯持示王王大懼乃上還常山中護衛及羣牧所儀衛司官軍校上與儀衛司是年瞻坡卒年十七謚悼僖王在位二十九年宣德六年卒謚簡瞻塙宣德七年以安陽王嗣王卒謚惠子祈鑑嗣卒謚悼子見潯嗣卒謚靖子祐採嗣卒謚莊子厚煜

詞五學編

### 趙康王厚煜

趙康王諱厚煜莊王子也性和厚嗜學博古敦尚雅



素事祖母楊妃以孝聞嘉靖七年六月 聖書褒予  
明年冬境內大饑王上疏請辭祿一千石佐賑濟  
世宗皇帝嘉王能憂國詔守臣發粟不允所辭車駕  
南巡王以遠出奉迎首致誠敬 特賜嘉獎益祿三  
百石王文藻弘麗聲譽浹於四方遠近能譚藝者莫  
不傾慕風采王又折節愛賓客以故戶屢恒滿文酒  
讌游有淮南梁孝之遺風常獨居一樓鮮近妃妾第  
以翰墨吟諷自娛著居敬堂集十二卷嘉靖三十九  
年十月庚申暴薨

先是洛川王翊鎔府人粥瓜彰德府通判田時雨隸

人竊瓜二人相毆直於時雨時雨以王府人情勢不靖遂捕問罪啟於王王令和解適有宗室數十人索祿時雨以宗室毆府官白於撫巡撫巡令知府傅汝勵盡捕收各府人王忿恚媿被欺滅入內無可暴白遂自經聞於朝 世廟下法司將時雨棄市戍汝勵於邊王勵志向道耽文嗜古敦尚簡素屏絕紛華著有居敬堂集在位四十年壽六十三謚康子載培嘉靖十年封獲嘉王十六年薨壽十七謚昭定嫡一子翊錙二十八年封世孫三十八年薨壽二十三嫡一子常清四十四年嗣贈祖恭父安王

通鑑錄

鄭王傳

鄭王瞻垓 仁宗仲子母李 妃永樂二十二年封  
漢庶人反王與襄王居守宣德四年之國鳳翔王請  
安王竹園韓王以安王舊邸得竹園 上曰園在鳳  
翔去平涼遠與鄭王便正統八年乞徙徙懷慶留京  
邸明年之國成化二年卒諡靖子祁鏐成化四年嗣  
乞河壩地弘治八年卒諡簡世子見滋卒以子祐杓  
封世子弘治十年嗣王贈父鄭僖王祐杓正德二年  
卒諡康無子見滋弟東垣端惠王見湏以子祐樾正  
德四年嗣王贈鄭定王祐樾十六年卒諡懿子厚烷

嘉靖六年嗣 車駕南巡王來迂賜幣物加祿歲三

百石

吾學編

鄭王厚烷鄭懿王子也嘉靖六年嗣爵 車駕南巡

王迎謁境上甚恭 詔賜幣加祿三百石嘉靖十六

年上疏陳母妃閻氏貞孝賢德事實 詔付史館又

乞 祖訓五倫爲善陰隲通鑑諸書二十七年疏請

上修德講學并進居敬窮理克己存誠諸箴復演

連珠十章以簡禮息政飾非惡諫神仙土木爲規諷

詞語切直 上手詔曰汝覘知宗室有諂訕者故茲

效尤汝真今之西伯也罪其長史再逾年而盟津長

子祐構訐王跋扈詛呪劾惑諸不法事 上大震怒

并責前四疏不臣奪爵幽鳳陽世子載堉亦篤學有

至性痛王非罪見繫不敢安寢築一室王宮門外席

藜獨處者十九 穆宗皇帝卽位赦免還國歲加王

祿四百石世子乃復入官而居萬曆二十一年冬世

子疏請宗生得令儒服就按母論京外職第入式者

視才品器使 詔允行之二十三年秋復上言歷算

歲差之法

請宗  
生儀  
服  
杖

斬王傳

斬王瞻垠永樂十九年卒贈斬王諡獻葬

京師西

山  
吾學編

越王傳

越王瞻墉未之國 宣宗賜昌平縣莊田四十頃卒  
諡靖葬京師西山無子國除已巳之變虜入王墳虛  
掠祭器去 五十四編

襄王傳

襄王瞻塔母 昭皇后永樂二十二年封未之國

上崩監國漢庶人反留守宣德四年之國長沙正統  
元年遷襄陽七年來朝景泰三年乞得山地百頃奪  
門時石亨等欲殺於謙王文謂謙等通奄王誠盜金  
符迎王 英宗因詔王來朝相見甚歡宴便殿王避  
席請曰臣過汴汴父老遮道言按察使王樂賢誣下  
詔獄臣途中詢樂人咸謂樂冤願 皇上加察 上  
立命法司雪樂王辭歸 上送至午門王伏地不起  
上曰叔父欲何言王頓首曰萬方望治如饑渴願



皇上省刑薄斂 上拱手謝曰敬受教四年又來朝 上爲峴山漢水賦襄陽四景歌賜王成化十四年卒年七十三謚憲長子祁鏞正統八年封世子成化十五年嗣弘治元年卒謚定定王三子長見淑成化十六年封世子弘治二年嗣明年卒謚簡簡王二子祐材弘治三年封世子明年嗣與興邸爭地灘逮七十二家獄久不決大理卿汪綸兩解得已十七年卒謚懷無子弟祐攢弘治四年封光化王正德中嗣

王嘉靖二十九年卒謚康

吾學編

康王無子定王庶二子陽山恭和王見芳子榮康王

祐楬庶一子厚頰三十一年進封嗣王贈祖恭王父  
惠王四十五年卒謚莊庶一子載堯封安福王隆慶  
三年嗣

絕繫錄

襄憲王瞻墀

襄憲王瞻墀 仁宗皇帝第五子也天資明睿通詩書及春秋宣德四年封之國長沙正統元年改封襄陽土木之役 車駕北狩王兩上疏慰 皇太后乞命 皇太子居攝天位急發府庫募勇敢以圖迎復仍訓諭 郕王盡心輔政章上時 景帝立八日矣英宗復辟得其奏於宮中覽之感歎手勅令王入朝相見甚歡中宴因問王時政王避席曰臣過汴汴父老遮道言按察使王棨賢以誣下詔獄臣途中詢棨人人咸謂棨冤願 皇上加察詔立命法司雪棨

獄王辭還國

上送至午門王伏地不起

上問叔

父欲何所言王頓首曰萬方望治如渴願

皇上省

刑薄斂

上拱手曰敬受教天順四年再入朝

上

爲峴上漢水賦襄陽四時歌賜之益王護衛又勅王

每歲秋冬之間得三五出城游盤以怡暢性情成化

二年春盜渠劉千斤反荆襄間建僞號聚衆至四萬

人大肆荼毒

詔尚書白圭督師討之王捐祿犒師

尋奏勦成化十四年薨壽七十三謚憲長子祁鏞正

統八年封世子成化十五年嗣弘治元年卒謚定

王三子長見淑成化十六年封世子弘治二年嗣明

年卒謚簡簡王二子祐材弘治三年封世子明年嗣  
與興邸爭地灘遠七十二家獄久不決大理卿汪繪  
兩解得已十七年卒謚懷無子弟祐懜弘治四年封  
光化王正德中嗣王嘉靖二十九年卒謚康

吾學集

康王無子定王庶二子陽山恭和王見滂子榮康王  
祐榻庶一子厚頰三十一年進封嗣王贈祖恭王父  
惠王四十五年卒謚莊庶一子載堯封安福王隆慶  
三年嗣

絕續錄

### 襄陽榮肅王祐懜

襄陽榮肅王祐懜襄憲王曾孫也七歲能文章神姿

魁岸雄健力制奔馬精騎射星曆兵農醫卜之書靡所不究其占災變言休咎修短遲速術多奇中又好持論經濟 世宗初年大禮未決王上疏言時議以

皇上入繼 孝廟爲人後者爲之子欲稱 聖父

興獻大王爲 皇叔考斯據宋儒濮伯考濮王耳當

時歐陽修已謂爲人後者不沒父母之名後竟以無稽止稱濮王爲親卽園立廟矣豈可引以爲 聖朝

法乎今日宜稱 孝廟爲皇伯考仍稱 聖父爲皇

考文簡而事理無遺彝倫攸叙公議定矣嘉靖四年春襄王祐憤病廢不視事承奉亨竊弄威福王惡之

執亨熏目坐是訐奏奪爵嘉靖十八年以大慶恩與  
乞復爵許之王嘗疏請令宗人執士農業得自贍足  
勿煩 朝廷歲祿之供禮官以非 典制不許嘉靖  
三十四年九月薨子厚燭嗣所著朱仲子集三卷式  
好傳若干卷行於世

蒲城志

荆王傳

荆王瞻堦母張順妃永樂四年生二十二年封宣德  
四年之國建昌乞南城縣司獄又乞近閑田正統四  
年改蘄州景泰元年十二月上疏請朝 上皇不許  
四年卒謚憲二子長祁鎬正統八年封世子景泰六  
年嗣天順五年卒謚靖靖王三子長見瀟天順中嗣  
弘治五年坐不法命太監蕭敬駙馬都尉蔡震都御  
史戴珊召王至并其長子祐柄降庶人遷置武昌見  
瀟弟見溥成化二年封都梁王十三年卒謚悼惠其  
妃何氏賜自盡子祐欄弘治七年以都梁王進封荆



王十七年卒謚和和王二子長厚烜弘治十六年封世子正德二年嗣嘉靖中病辭祿不允王二子長戴盛嘉靖九年封永定王吾學編三十九年卒謚端穆嫡一子翊鉅以永定王長子進封世孫三十四年嗣王贈父莊王嫡一子常泠封世子隆慶三年以罪廢爲庶人安置武昌四年王卒謚恭嫡二子常信封泰寧王萬曆二年進封嗣繩盤錄

荆端王厚烜

荆端王厚烜荆憲王玄孫也憲王初封建昌正統中改封蘄州景泰元年十二月王嘗上疏請朝 上皇

不許在位三十年而薨四傳而至端王王性謙和溫粹銳思典籍尤以篆隸著名正德中病未疾不能朝謁再疏懇辭爵祿不允 詔許令弟富順王厚焜攝朝謁嘉靖三十一年薨孫翊鉅嗣爵

### 富順王厚焜

富順王厚焜荆和王第二子也正德九年冊封王幼孤未就外傳稍壯媿與長者語乃潛心問學發憤至廢食寢遂博貫琴藝嘗讀劉向說苑至臣欲事而君不用子欲養而親不待輒三復涕下王嗜詩兼精繪事一日拂素圖蜀葵移暴日中蜂蝶叢集花上拂之

輒來其神妙動物類如此著東軒集二卷第永新安  
莊王厚熲亦以能詩著名

### 樊山溫懿王

樊山溫懿王見潞荆靖王第三子也忠睿有大節弘  
治五年九月荆見瀟以淫虐聞王并發其陰謀不軌  
而瀟亦訐王隱逼奏上 上嘉王潛銷荆楚大害功  
置王過不問奪瀟爵爲庶人王由是顯名正德元年  
懿子莊和王祐構嗣爵莊和子厚熲是爲恭裕王

### 恭裕王載坫

恭裕王之子載坫嗣王坫喜讀書博極經史爲人脫

良 封不乞 四

略不羈能折節下士藩王故不投人名刺接諸縉紳  
亦無賓主禮王獨易之 典制郡王女封縣主歲食  
祿六百石王自以已祿糜費國庫無所補甚柰何復  
令女子冗食乎故王四女不復乞封而以妻諸郡學  
弟子隆慶六年嘗上書請自試効用又上應 詔正  
禮兩疏疏留中弗報王貧而好客不以冕爵矜人日  
事詞賦晚更窮易諱理揮冠野服瀟畦種藥以自娛  
人咸稱井甬先生著大隱山人集十七卷又著茹蠟  
子三徑諸詞各一卷子翊紙翊歷翊製皆工詩兄弟  
常共處一樓讀藝不倦號花萼社

蘇州志

淮王瞻煥

淮王瞻煥母李賢妃永樂二十二年封宣德四年之  
國韶州開府府治正統元年遷饒州十一年卒謚靖  
子祁銓正統十三年嗣卒謚康世子見濂早卒見濂  
清江王見濂以子祐榮嗣贈淮端王祐啟弘治十八  
年嗣王嘉靖三年卒謚定無子弟鎮國將軍祐揆嘉  
靖四年嗣王十六年卒謚莊子厚熹嘉靖八年封世  
子十七年嗣在學編四十二年卒謚憲嫡子載堦四十  
五年嗣續錄

滕王瞻墉

滕王瞻墉母郭貴妃永樂二十二年十月封宣德改  
元卒年十七諡懷葬京師西山無子國除其長史姚  
友直事王王喜其恭謹宜宗愛王爲陞友直雲南  
左叅議掌長史司事

吾學編

梁王瞻垧

梁王瞻垧母

恭肅郭貴妃永樂二十二年封即郢

邸開府宣德四年之國承奉孔勤侮置王

上曰梁

王朕親弟奴敢如是逮勤王又爲解

上曰羣奴惕

王耳竟誅勤未幾上表不恭有司請治長史

上以

王故特不問襄獻王自長沙徙襄陽過安陸王出迎

明日獻王入城相見歡甚又明日辭去王泣曰嗟乎

吾兄弟不得更復相見奈何正統元年

上言府卑

濕乞更爽境地

上曰郢中歲屢歉汝有秋理之竟

不果徒六年卒謚莊葬安陸妃紀氏繼魏氏無子國

除景泰二年魏妃卒妾張生女二皆封郡主封張王  
夫人掌王宮事成化十六年亦卒梁故盡得郢田宅  
園湖後皆賜襄王 睿宗封安陸得梁郢田供二  
王祝事

五言學編



衛王瞻埏

衛王瞻埏未之國 仁宗簡舊官臣司直金寔爲王  
左長史宣德初兒 郊社陵廟禮每命王攝事正統  
三年卒謚恭妃楊氏謚貞烈無子國除

五百學編

榮王

景泰元年五月丁未正使都督張軌副使太子太保  
吏部尚書何文淵持節封 裕陵第二子爲榮王或  
曰卽德王也又有三 皇子未封卒 吾學編

許王見淳

許王見淳 英宗子母王惠妃王生時 英宗北狩  
未還景泰廢太子封沂王也并封沂王弟見清榮王  
見淳許王景泰二年十一月許王卒於京師禮部請  
喪用親王禮 內批王幼殺其禮設悼葬西山

吾學編

德王見濬

德王見濬天順元年三月六日復東官是日立德秀  
崇吉四王歲祿各本色萬石德王初封德州改濟南  
成化二年就國二十一年請業南旺湖以漕渠故不  
許正德十三年卒諡莊子祐恪正德十六年嗣嘉靖  
十九年卒諡懿子厚燉十二年封世子卒諡懷順世  
子載塔十九年嗣贈厚燉德懷王吾學編萬曆二年卒  
諡 嫡一子翊 萬曆 年嗣龍於錄

秀王見澍

秀王見澍母高淑妃景泰三年生於南城成化三年封國汝寧左長史劉誠獻王千秋日鑒錄王大喜之國時淹於途民以爲擾左長史爲言王輒急行抵國宦豎言王居隘請移先師廟廣王居王不聽一日兩長史講書西伯戡黎左長史主吳氏說曰戡黎者武王也右長史趙銳主孔氏說曰文王定戡黎兩長史辯大爭王徐曰先王簡二先生輔余經義卽未有定論何嫌往復乃爾動色兩長史頓首謝王卒謚懷葬京師西山妃黃氏無子國絕王有官人陳氏召還

皇朝新編

卷之二

京成化中特封爲夫人

五言學編

四十一

崇王見澤

崇王見澤天順九年封成化十年之國汝寧弘治八年孝肅太后思見王上勅召王朝禮官倪岳言二年間三王之國郡縣供需兵民皆困崇王復來往返勞費何以堪兼水溢旱蝗舟車所經恐有他虞親王來朝雖有故事然自洪熙宣德以來已鮮舉行英宗復辟襄王奉詔來朝雖篤敦叙之恩實塞疑讒之隙宜勿召王使初上不允岳言已而中止十八年卒謚簡簡王四子長祐察弘治中嗣正德六年卒謚靖靖王四子長厚燿正德十九年嗣嘉靖十六年

卒謚恭長子載境八年封世子十七年嗣乞修府下  
巡撫議費銀八萬七千兩工部言親王修府例役護  
儀牧人不得輒勞民 上不允十九年王請父恭王

墓表禮部言韓府襄陵莊穆王卒 憲宗嘗允其子

範征請令詞臣撰銘刻石崇王曾祖皆嘗賜墓表請  
如王奏 上若曰宗室薨逝給壙誌此 祖宗典制

安得有賜表事襄陵王立石已非例崇兩王墓表皆  
先朝誤恩後有王家乞請禮部宜考 累朝體例

議覆吾學編三十六年卒謚莊嫡世子翊鏞三十七年

嗣又乞恭莊墓表竟 欽賜馬子常浚萬曆五年封



世子 龜螿錄

世子 龜螿錄

三

忻王見治

忻王見治母宸妃天順二年生生九歲而封封七年未之國卒謚穆葬京師西山

吾學編

吉王見浚

吉王見浚國長沙陳友諒初據長沙友諒誅長沙稅  
畝特重民流移多荒棄王因請得賜名鵝鵝食田十  
三萬畝徵稅尤重嘉靖初令減十五嘉靖六年卒謚  
簡一子祐扶弘治四年封常山王正德四年進封吉  
世子五年卒謚悼莊二子長厚熹正德十四年封吉  
世孫嘉靖八年謚王十年贈父吉悼王明年乞長沙  
府湘潭商稅邸租不許卒謚定二子長載均嘉靖十  
五年封光化十九年嗣王嘉靖四十年卒謚端嫡世  
子塲鎮四十二年嗣隆慶四年卒謚莊無子庶長兄

廟制錄

卷之二

塙鑿封龍陽王隆慶六年進封嗣

繩蟄錄

卷之二

徽王見沛

不圖  
府常  
不升

徽王見沛成化十七年之國鈞州歲祿本色萬石妃  
黃氏與秀王妃兄弟也弘治二年乞陞州爲府吏部  
尚書王恕言肅潘荆岷皆封州鈞不得獨陞府從之  
王卒謚莊子祐檠正德三年以興化王進世子嗣嘉  
靖四年卒謚簡子厚煇嘉靖五年以安邑王進世子  
嗣厚煇父子繼請陞鈞州爲府朝議不許嘉靖中  
車駕南巡王迓送恭加縣歲三百石 侑金幣音學  
王好琴有姚梅者善斲琴王命趙得周從梅得其法  
州守潞人陳吉嘗取學官番所擊桐召梅斲之而得

周弘見吉願減值改畀已作梅遂訟於長史長史杖  
得周得周言吉吉解得周縛而杖長史隸長史又取  
吉隸杖之明日吉謁王處分承奉趙犴大辱吉吉忿  
呼門外王怒令軍校裂吉衣服被髮徒跣抵暮入州  
夜出城奔愬上官王馳奏吉 上逮吉繫詔獄巡梅  
都御史駱昂巡按御史王三聘上疏爲白吉寃俱被  
逮昂杖死三聘吉俱謫戍議者遂不直王時真人陶  
仲文被 上寵王以官人金姐送仲文仲文德甚言  
王於上 上遣使又來王極意接奉仲文返具言王  
忠敬奉道 上悅封王太清輔玄宣化忠道真人及

金印王旣受 上知益作威福然輕財務施故終其  
身無覆敗之禍二十九年薨在位二十五年壽四十  
五謚恭妃齊氏庶二子載瑜五年次妃傅氏生三十  
年以浦城王嗣三十五年罪廢爲庶人削去世封籍  
沒財產國除自殺瑜性喜遊縱耽貨色校尉楊懋德  
少與瑜狎瑜信任之懋德勸瑜修父業南陽人梁高  
輔稍通黃白之術自言少師尹蓬頭能取紅鉛梅子  
堦客之館下用其術取梅子配以含真餅生兒未啼時口中  
等藥服之久之以高輔並藥因仲文進 上上封

高輔通妙散人封堦清微翊教輔化忠孝真人及金

印增滋不檢遂借官牒等之南京又託以支鹽抵揚州買妾以歸已而高輔爲上取梅子不得以書求增舊所蓄者增不報會上疑高輔並疑增增遂與高輔絕往來時儀衛官紀旻見增所爲策其必敗時時勸增懋德銜之乃抵書高輔譖旻高輔遂以旻不與紅鉛言上上並惡增遂效壽所賜真人印頃之緝事衙門遣數校尉以方士謁增增不禮增差李邦吉上京奏事緝事者疑爲旻縛送兵馬司訊非是差官校押送增增又不禮增見上有厭薄意乃使旻齎紅鉛送仲文所欲因仲文獻上高輔方與仲文



有邵廉知之奏仲文得拾金若干仲文自此遜避而

御札與仲文又有莫管徽事之語會民人耿安喬

希禮奏其強搶子女強占田宅等事勘官以疇昔斲

桐之役遂成大獄革去祿米三之二并追恭真人印

璽見事迫欲取莊王始封所有金符佩以赴京未得

先是瑜有揚州金陵總得意鳳陽弄醜羞同余之語

撫按取入招詞法司勘上旨下徽王稔惡懷逆僭僣

窺伺姑革了王爵降爲庶人押發高橋好生禁錮削

去世封冊寶章服財產籍沒遠制亭堂盡行拆毀特

瑜居深官而所司防守甚嚴 朝廷處分瑜不得聞

司禮少監王臻同撫按至禹埕聞砲聲懼甚先令正  
妃沈氏等十六人就縊埕登樓望見龍亭後有紅板  
橋子歎曰吾既不能自明徒生何爲遂自縊次妃林  
氏等義同死爭取帛自縊後死者五十餘人命下  
淺葬城東喇嘛寺子七人長安陽王翊錡次萬善王  
翊鈞各年十二歲俱革爵次翊鉞次鏞未封未名者  
三人女三人俱遷送省城聽周王鈐束不許混請婚  
封 穆宗改元准錡等還禹給與房屋居住

繼勳錡

懷獻太子見濟

懷獻太子見濟 景帝長子母杭妃景泰三年四月  
思明土酋黃玠者初以功授丘溫衛指揮歷陞廣西  
都指揮使守備潯州思明土知府瑯庶也瑯老子  
鈞襲知府玠欲殺鈞奪知府與其子矯軍門令徵兵  
思明令其子糾諸心腹驍悍數千人去府城三十里  
結寨夜馳破府城滅瑯家支解瑯父子納甕中痊後  
圍卽引衆還寨明日報至佯不知驚哭仆地走思明  
發喪尋瑯父子屍不得又慟哭仆地揮淚遣人告玠  
急捕賊復此家門大雋方玠子殺瑯時瑯有僕福童

見玠子并識其左右人脫走憲司訴玠父子殺瑯父  
子狀郡中人亦皆知賊本玠父子也左副總兵武毅  
疏聞於朝玠大懼謀於侍郎江淵令遣千戶袁洪走  
京師上奏請廢太子立見濟爲太子疏曰 太祖百  
戰艱難取天下期傳之萬世往年 上皇輕身禦虜  
文武將吏十喪八九駕陷虜廷寇至都門幾喪 社  
稷不有 皇上臣民何歸今且踰二年 皇儲未建  
臣惟人心易搖多言難定爭奪一萌禍亂不息 皇  
上卽循遜讓之美復全天叙之倫恐事機叵測反覆  
靡常語曰天與不取反受其咎近日仰觀天象土星

逆行入太微垣與諸災變皆可畏愕願早留意萬一  
羽翼長養勢權轉移委愛子於他人寄空名於大寶  
階除之下變爲寇讎肘腋之間自相殘感此時悔之  
晚矣乞與親信文武大臣密定大計以一中外之心  
絕覬覦之望疏入 景帝大喜曰萬里外有此忠臣  
亟下廷臣會議且令釋玠罪陞都督是月乙酉禮部  
尚書胡濙侍郎薛琦鄒幹棗文武羣臣廷議衆相顧  
莫敢發遊疑久之司禮太監興安鴈聲曰此事不可  
已卽以爲不可者勿署名無得首鼠持兩端羣臣皆  
唯唯署議於是濙等既魏國公徐承宗寧陽侯陳懋

安遠侯柳溥武清侯石亨成安侯郭晟定西侯蔣琬  
駙馬都尉薛桓襄城伯李瑾武進伯朱瑛平鄉伯陳  
輔安鄉伯張寧都督孫鏗張輓劉深張通郭瑛劉鑑  
張義錦衣衛指揮同知畢旺曹敬指揮僉事林福尚  
書王直陳循高穀何文淵金濂于謙俞士悅左都御  
史王文王翔楊善侍郎江淵俞山項文曜劉中敷沈  
翼蕭鉉王一寧李賢周瑄趙榮張敏通政使錫通  
政樂憚王復叅議馮貫卿蕭維禎許彬蔣守約齊整  
李賓少卿張固習嘉言李宗周詩能陳誠黃仕儻張  
翔齊政寺丞李茂李希安柴望鄺鏞王溢翰林學

士商輅六科都給事中李讚李侃李春蘇霖林聰張  
文質十三道御史王震朱英涂謹丁泰亨強宏劉琚  
陸厚原傑嚴樞沈義楊瑄王驥左鼎上言父有天下  
必傳於子 陛下膺天明命中興邦家統緒之傳宜  
歸 聖子黃玠奏是 制曰可朕上請 聖母上聖  
皇太后太后言予老矣願宗社安天下得太平人心  
既如此不可拂朕敬承慈命禮部具儀擇日以聞卽  
日簡置東宮官懋亨濠直四人太子太師溥循殺謙  
四人太子太傅梶文淵濂南京禮部尚書儀銘士悅  
工部尚書兼大理卿石璞都御史鎰文翔九人太子

太保淵一寧滋三人太子少師山太子少傅錫維楨  
兵部左侍郎俞綱都御史羅通四人太子少保輅兵  
部左侍郎兼左春坊大學士中敷太子賓客嘉言詹  
事文暉琦少詹事幹左庶子侍讀彭時侍講徐理左  
右諭德修撰李詔侍講劉定之司經局洗馬侍講楊  
鼎倪謙呂原修撰柯潛左右中允李侃御史魏齡詹  
事丞編修周洪謨劉俊檢討錢溥編修岳正左右贊  
善編修周安李泰林聰典籍鄒循左右司直郎侍書  
陳穀徐似監丞鮑相繇丞高誠左右清紀郎檢討曾  
暹傅宗五經博士陸藝典籍李鑑左右司諫編修



輿校書中書舍人劉鉞趙昂正字教諭劉潔錄事序  
班揚欽王政周寧傅榮通事舍人凡東宮公孤皆支  
二俸五月甲午立見濟母抗妃爲皇后詔曰天佑下  
民作之君實遺安於四海父有天下傳之子斯本固  
於萬年大赦天下先是一日陳儀仗奉天門有男子  
執赤挺直入擊香亭奮呼曰先打東方甲乙木諸內  
使急縛男子詔付錦衣獄庾死乙未以東宮令大賞  
文武百官吏軍士丙申禮部言太子冲年百官朔朔  
望丁未柳溥于謙充正副使持節更封太子爲沂王  
癸丑以立太子故賞諸親王公主乙卯賞邊鎮文武

內外羣臣又加賞內閣陳循高穀學士江淵王一寧  
蕭鑑商輅各黃金五十兩六月以后兄杭聚爲錦衣  
正千戶四年二月乙未太子冠命胡濙持節掌冠高  
穀贊冠蕭鑑宣戒勅甲辰冠沂王及其弟榮王命陳  
循于謙持節掌冠何文淵儀銘贊冠商輅宣戒勅十  
一月以御史張鵬言簡東官師傅講讀官 上命胡  
濙王直陳循高穀王文儀銘江淵蕭鑑俞山俞綱商  
輅日更番侍班彭時日專講書李侃李齡錢溥劉吉  
日專侍讀書王謙趙昂更日侍書越四日 太子薨  
益懷獻葬西山天順元年降稱懷獻世子

悼恭太子祐極

悼恭太子祐極 憲宗長子成化七年十一月己酉  
立爲皇太子是年十二月上旬彗星見東方未幾  
皇太子卒葬西山

吾學編

岐王祐

岐王祐 封德安弘治中請迎母養不許許諸王有  
子別居者得迎養其母母有子多亦從一子無子者  
移別宮著爲令王卒益惠妃王氏葬西山國除

吾學編

益王傳

益王祐檳封江西建昌母張德妃德妃生王及衡王  
汝王茂陵諸王皆歲給祿本色萬石弘治中進馬嘉  
靖十五年奸人班明誣昌國公通王有逆謀得白十  
八年卒謚四子長厚燁正德四年封世子今嗣王  
弟崇仁王厚炫金溪王厚煌玉山王厚煥凡三王嘉  
靖初廷臣請以崇仁王後齊宗嗣興王不許厚炫  
五子載增封長子次載環載坑載崇載壤厚煌一子  
載增五子載增封崇仁王長子卒嫡一子胡釗三十  
七年以長孫進封世孫嫡一子常港隆慶三年封世

曾孫

續蟹錄

益莊王神道碑銘

張時微

昔太史公表漢諸侯王誦言驕奢之禍歸之以仁義  
爲本大都殞身亡國率由淫縱不法有如河間東平  
被褒表之光而流丹青之譽未始不飭厲兢兢也余  
於益莊王蓋深有感焉王諱厚燁號勿齋太

祖高皇帝七世孫憲宗純皇帝其祖也父益端

王母妃彭氏端王始藩于益蓋甫離紫禁狎熟

崇貴事厚自貶損鞠躬厲行刻意問學賢德稱於天  
下而莊王實肖之生而靈異穎敏端恪雅有至性不  
妄言笑正德己巳受封益王世子口居東府考覽

六經蒐綜百氏神解妙悟不煩師程事 端王暨

母妃小心翼翼先意承志比其薨也哀毀骨立寢苦

塊飲水恒如初喪及葬徒跣擗踊拊棺而號觀者感

泣士人爲賦睿孝永思詩刻梓以傳云朔望展謁歲

時蒸嘗必潔齋致虔每誦蓼莪之詩輒慘怛不擇以

金華園寢實惟埋玉之所乃建樓宮中時舒望焉至

則噫吁流涕左右莫能仰視嘉靖辛丑襲封王爵愈

自抑畏百爾政務恪遵先王之舊蓋不特三年母改

而已每遇 皇帝萬壽及歲節慶賀寅恭齋慄儼若

天顏之只尺也北虜不遜宵旰靡寧輸金錢以助



邊餉恨不得身先矛戟待同母弟 崇仁王庶母弟

金谿王 玉山王友愛篤摯猶子字之若已出服

食器用罔不優錫每上謂卽課其書程而飭厲之學  
有嚮往輒加褒獎焉王性朴素於外物絕無所嗜願  
獨嗜學鷄鳴盥漱卽灑掃庭內陳經史於几上危坐  
諷誦恒至夜分雖盛暑不輟每五日一詣書堂命儒  
臣進講陳說理道及治亂興衰之故誠有味乎其言  
之也自以勿名處日嚴飭治之功本原澄徹踐履光  
明雖詩書所稱茂以尚矣精研書法真草小篆爲世  
所珍撰著詩文淵深尙永不異學士家語擇端雅之

師羣國之子弟而教之季有所稽以察惰勤宦寺女  
御亦誨之讀書習字屬對詠詩蓋以折其驕逸之氣  
而牖之義方宮殿之中伊吾絃誦若黌校焉古今書  
籍有關治理及切於民生者躬校亥豕序其要旨錢  
梓以傳如命儒生張容所輯 皇明文範此其大者  
也尤究心眞氏大學衍義嘗曰帝王之道盡在於是  
遵而行之庶幾寡過矣乎平居不喜華靡巾服浣洗  
必敝而後易酒不常設肴不兼味劇戲音樂了無所  
好非大饗宴鐘鼓絲竹之聲蔑如也臣下有僭侈踰  
度必痛繩之曰儉德之共奢惡之大汝寧弗聞柰何

以此自阱乎居常施恩有序月加直米以養其廉長  
史有所建白必虛心聽之風肯講讀之臣雖沒世而  
禮其子姓不衰待外戚惠而有所然未嘗以國事借聽  
異端佛老拒之尤嚴謫詞不忤讒說不入剛明決斷  
國紀斬然內外臣僚小失則宥之有大過必麗之於  
法如曰擅課竹木漁獵舖戶橫奪街市此尤不檢之  
最者率劫恣不貸內臣中有濫受訟詞刑罰苛虐者  
卽毀其刑具而譴戒之凡笞罰自五以上必啟請焉  
豐歲廣糴防歉推其餘以貸單窶封內橋梁有弊壞  
者輒捐重貲完葺之東西二門民苦於渴鑿大井以

濟焉歲甲寅疫作徧施藥餌全活無算民忘其瘡也  
軍校與民爭訟曲在軍校則罪軍校曲在民也付之  
有司不加楚撻貿易物貨一惟其平四境之內享安  
靖之福若不知有土府也春秋祈報出宿齋居嚴於  
對越粥粥焉如在其上嘗謁文廟中使設拜位於殿  
中卽命徙於外臺時微雨初沾有張蓋至者卽斥去  
之而命儒官講周易尚書錫賚有差談者以爲盛美  
庠生有貧不自給輒爲賑恤不必其釜之魚也每賓  
興應試行者有送中式有燕其他優禮纓紱非可殫  
述而郡邑細大之事一切避謝不與以故學士大夫

觀風諷俗者必曰賢王賢王云王生於弘治戊午十月十一日至嘉靖丙辰凡五十九年矣偶感風露之疾猶暹勉視朝不欲勞人問候已乃大漸稍親藥餌而已不可起矣乃以五月二十二日薨於正寢士民莫不悲悼曰天何奪吾賢王之速耶先是郡後有鎮山曰鳳凰岡者崩折一角轟然有聲一夕赤氣亘天光彩烜赫人咸異之此始其徵乎所著詩文數百篇行於世訃聞於朝 天下震悼輟朝素服命禮官考德稽厥賜諡曰莊遺新寧伯譚功承祀以大牢行人馬文健敦壙事欽天博士李傅卜日景方以薨之

明年丁巳歲三月十七日葬於金華山水濺之陽啟  
元妃王氏之窀而合窆焉禮也 元妃者金谿王

文安公之裔荊州府別駕綸之女世德象賢通經書  
大義 繼妃萬氏南城封兵馬指揮萬梓堂之女德  
門流慶貞靜幽閑游神文翰警戒相成有關雎葛覃  
之風恂王升遐絕而復蘇襄事慎終井井不紊王無  
嗣以弟 崇仁王襲爵繼美楊休光昭佑啟懼先德  
弗暢而典刑之日遐也爰命儒紳式揚鴻懿思所以  
遠播芳塵垂之不朽乃不遠數千里遣儒生趙玉以  
書來曰嗚呼先王公宜聞之矣惠露霑吳仁風扇越

此宜有耆壽昌熾之休如古昔詩人所稱而今僅止  
此也天道其可知乎雖然炎昊無金石之固且真異  
橋松之齡存乎天壤而弗敵者在德不在年矣先王  
嘗讀芝園集每擊節稱嘆曰是當求之於秦漢今鮮  
其儷者也於乎道範雖往德音猶存非公莫可以銘  
墓道者矣余昔提學江右蓋稔聞 端王之賢既任  
保釐又知有 莊王焉得之門人張譽最者詳矣乃  
其言又知我者遂不辭而爲之銘銘曰

皇皇烈祖肇造丕基 重光奕葉瓜瓞蕃滋穆穆

端王如璋如珪啟藩南國爲屏爲毗敬爾王度風夜

無違匪亢其居德音是恢篤生 莊王是則是儀淵  
騫爲友姬孔爲師朝經暮史左箴右規雍雍肅肅于  
廟于閨蔬糲之食浣濯之衣絲竹不御文翰是怡秩  
祀孔嚴胎假祁祁 天子萬壽夔牆在茲有虔拜舞  
是祝是祈獫狁突入餉我金貨憂其國恤絕其燕私  
因心則友永言永思屹彼華峰孺慕興悲郡邑組綬  
庠校纓綬 皇國顧幹振之翼之森森闡闡總總萌  
黎 皇國基本沫之哺之或濟其渴或飮其饑以藥  
以梁拯彼難危劼忒臣僚罔有愆迷過曰予懲善曰  
予咨毋路於螫爲域爲虺毋市於鷩爲獵爲漁大者



有辟輕則用笞維此令德寰宇攸推仁沾動植義洽  
墳笮繩其祖武燕翼是貽孰謂弗壽藝圃徵詞孰不  
有詞仲氏楊徽華山之陽澗水之涘於萬斯年鑒此  
穹碑

衡王祐輝

衡王祐輝成化二十三年封青州卒謚恭子厚燾初封江華王嘉靖十年卒封世子十八年嗣王有賢行

吾學編

隆慶六年卒謚莊子載圭萬曆三年嗣

通鑑錄

新樂王載璽

新樂王載璽端惠王子而衡恭王之孫也博雅善文辭敦尚德行汲汲然以著述詞賦爲勲業嘉靖三十六年冊封著丁巳同封錄一卷思欲表見宗藩有才藝者走書天下索同姓所纂述得數十種會梓而傳之謂之繪合繡揚樂又撰洪武聖政頌皇明政

要頌樓居稿田居稿夢翫仙閣神覽滄溟各一卷其  
詩冲澹夷遠有獨造之趣多可傳者

蒲獻志

雍王

雍王祐 封衡州弘治四年之國十一年即震壞正  
德二年卒諡靖妃吳氏葬西山岡除 孝惠邵太后  
三子 睿宗及岐雍二王也

在作學編

壽王

壽王祐楛封保寧改常德嘉靖

年卒諡

無子

因除壽王有兄八皇子未封卒

吾學振

汝王

汝王祐棹封衛輝弘治十四年之國正德十五年王以婚故請預支食鹽十年年三百引上曰王以婚禮請宜別給長蘆鹽二千引食鹽如故嘉靖十八年車駕南巡王迓於途甚恭上喜加祿歲五百石賜金幣二十年卒諡安無子國除

吾學編

涇王

涇王祐樛母楊恭妃弘治四年封十五年之國沂州卒謚簡妃曹氏子厚烜嗣病辭祿不許未幾卒謚

無子國除葬西山長史沈煥以王卒故改

南京鴻臚少卿

吾寧編

榮王

榮王祐樞母潘端妃弘治四年封常德正德初留京  
邸劉瑾惡王與吏部尚書張綵謀逐王就國王嘗爲  
諸子請得食鹽菜戶嘉靖四年請沅江西港天心園  
坪淶池河泊稅八年盡取諸稅供王祿十八年卒謚  
莊六子長厚勲正德中封世子嘉靖十一年卒謚懷  
穆子載瑾嘉靖十八年封世孫嗣贈其父榮懷王

學編

五古



申王

申王祐楷涇王同母弟也成化二十三年生生五年而封封十一年而冊妃項氏又明年而卒謚懿葬京西蘭山無子岡除王邸建於四川叙州未之國嘉靖中粥邸僅得銀萬兩

吾學編

蔚王

蔚王厚 孝宗第三子母 孝康皇后早夭謚悼葬  
西山

岳王

岳王 睿宗長子母 慈孝皇太后弘治十三年六月生生五日而卒嘉靖初贈岳王謚懷墓在承天

睿宗子女五長岳王次長寧長公主生歲卒次善化長公主十歲卒初皆封郡主嘉靖初贈長公主又次鄔公主又次謝公主皆婚而卒駙馬都尉鄔景和謫居蘇州謝詔長宗人府事三十九年四月賜岳王名厚熙

哀冲太子

哀冲太子載基 世宗長子母閭貴妃嘉靖十二年  
八月生十月薨溢哀冲葬西山

莊敬太子載壑 世宗二子母王貴妃嘉靖十五年  
生十八年立爲皇太子三十一年薨溢莊敬葬西  
山

景王載圳 世宗第四子母盧靖妃嘉靖十六年生  
十八年封四十年之國德安四十四年薨在位二  
十七年壽二十九溢恭葬 妃 氏無子國除

穎王載壘 世宗第五子母江肅妃嘉靖十六年生

次日薨諡殤葬西山

戚王載堊 世宗第六子母趙懿妃嘉靖十六年生

十七年薨諡懷葬西山

薊王載壻 世宗第七子母陳雍妃嘉靖十六年生

十七年薨諡哀葬西山

均王載堊 世宗第八子母趙榮妃嘉靖十八年生

十九年薨諡思葬西山

穆宗子

憲懷太子翊鉞 穆宗長子母 慈聖太后嘉靖三

十四年生三十八年薨葬

隆慶元年賜諡

靖王翊

穆宗第二子母

仁聖太后嘉靖四十

一年生是年薨謚悼葬

潞王翊鏐

穆宗第四子

今上同母弟也隆慶

二年生萬曆

年封

年之國

俱繩盤錄

大都督府左都督節制中外諸軍事朱公傳

黃全

朱文正南昌王子也國初從渡江克太平破陳也先  
管取建康歷有戰功擢爲樞密院同僉辛丑三月改  
樞密爲大都督府命文正爲大都督節制中外諸軍  
事八月上克江州僞漢陳友諒平章祝宗以南昌降  
壬寅正月上命宗從徐達征武昌宗中途叛回據南  
昌四月始定其亂上曰得南昌是去陳氏之一臂  
況其地襟帶江湖控荆引越乃楚之重鎮爲吳西南  
之藩屏人好訟難制山寨未降者多非骨肉老成莫

能治之五月命文正統元帥趙德勝等往鎮其地授  
節鉞文正既至增復城池嚴爲守備招諭山寨未降  
首目悉樂歸順健訟者誅之號令明肅遠近震懼癸  
卯四月陳友諒自武昌親率舟師號六十萬圍南昌  
用雲梯等攻具百道擊攻文正城上發砲石箭無不  
破之敵怒自是晝夜環攻友諒親督促之意必拔文  
正主畫中軍分布諸將隨方應敵翦獲甚衆友諒復  
以其所獲吉安守將劉齊朱華臨江同知趙天祐徇  
城下文正畧不爲動至六月被圍日久音問不通援  
兵不至文正遣千戶張子明告急於建康敵攻城益



急文正遣捨命王詣友諒營詐約日出降友諒信之  
緩其攻及期城上旗幟一新至暮不出友諒縛捨命  
王於城下殺之文正堅守以待授至初子明取東河  
小魚舟夜從水關潛出越石頭口夜行晝止半月始  
達建康見上具言其故 上問友諒兵勢何如子明  
對曰友諒兵雖盛而戰鬪死者亦不少今江水日涸  
賊之巨艦將不利用又師久乏糧若援兵至可破也  
上謂子明曰汝歸語文正但堅守一月吾當自取  
之子明還至湖口爲友諒兵所執友諒使呼文正出  
降子明至城下呼曰大軍且至固守以待文正聞之

守益堅敵莫能破七月丙戌圍且三月 上親率諸將統舟師二十萬討之友諒始解圍與王師大戰鄱陽湖竟敗死禁江口當是時友諒空國而來強兵壓境使南昌不守其爲敵之資豈細也哉文正用其智勇卒保無虞亦可以爲難矣故論守南昌文正功居多甲辰二月武昌旣平湖南江右郡邑多款附惟熊天瑞竊據贛州尚爾負固 上命江西叅政鄧愈率諸軍往征仍文正以本省頭目官軍除擇在城親馭守禦洪都其餘軍官悉付鄧愈統領以助聲討乙巳丙午等年遣部將何文輝討平江西未附州縣後數

年卒子守諫封靖江王

靖江王傳

靖江王守謙 太祖長兄南昌王之孫也南昌王從祀 廟庭子文正少孤其母王氏守節撫文正依太祖太祖愛之比長涉傳記有才畧從渡江克太平破陳也先取建康擢樞密同僉辛丑改院爲大都督府文正爲大都督節制中外諸軍事尋統元帥趙得勝等鎮守南昌號令明肅癸卯四月陳友諒圍南昌用雲梯攻具百道進擊文正主畫軍中隨方應敵剪獲甚衆友諒獲吉安守將劉齊朱叔華臨江同知趙天祐徇城下文正不爲動至六月援兵不至文正遣

千戶張子明告急建康敵攻城益急文正遣捨命王  
詣友諒營詐約降友諒緩攻及期城上旗幟一新至  
暮不出友諒縛捨命王城下殺之子明從水關潛出  
夜行晝止半月始達建康 上問友諒兵若何對曰  
彼兵雖盛戰鬪死者亦不少今江水日涸賊巨艦將  
不利又師久乏糧若援兵至必可破 上謂子明汝  
歸語文正堅守一月吾當自取之子明還至湖口被  
執友諒使呼文正出降子明陽許之至城下呼曰大  
軍旦夕至諸軍宜固守以待友諒殺子明文正守益  
堅七月 上統舟師二十萬來援友諒始解圍逆戰

鄱陽湖竟敗死禁江口甲辰文正遣部將何文輝等  
討平江西按察使李飲冰言文正驕奢不遜有怨言  
上詰責大懼謀叛降張士誠 上大驚曰噫此子

不才至此非吾自行不可即日登舟至南昌泊城下  
召文正倉卒出謁 上泣曰汝何爲輒起此意遂載

與俱歸羣臣劾請伏法 上曰吾兄惟此兒免文正

官安置桐城召其子鐵柱語之曰兒無恐爾父違訓  
教忘艱難恣兇狡貽我憂我育汝汝長且封汝我終  
不以汝父故廢汝未幾文正卒洪武三年封鐵柱靖  
江王名煒又改名守謙國於桂林桂林獨秀山前有

元順帝潛邸改爲王宮未幾以淫虐廢爲庶人使田  
鳳陽閱七年復其王使居雲南 賜璽書戒諭比至  
雲南益貪暴召還安置鳳陽又橫恣不法召至京捷  
而綱之二十五年卒于贊儀尚幼 上憐宗室諸王  
皆無後命爲世子留京師贊儀恭慎好學能書洪武  
三十年春遣省晉燕周楚齊蜀湘代肅遼慶谷秦諸  
王先自蜀入楚湘歷陝西出河南上山西抵大同宣  
府北平東至大寧遼東轉於山東擇文武忠厚之士  
以從以贊儀年幼欲其知親親之義且令涉山川險  
易也永樂中遣之國卒謚悼僖子佐敬嗣卒謚莊簡

子相承嗣卒謚悼順子規嗣卒謚昭和子約麒嗣卒  
謚子經扶嗣卒謚安肅子邦寧嘉靖六年嗣先  
是靖江府食鹽歲給銀廣東至桂林市鹽至是乞支  
本色不許又乞桂林府稅銀亦不許

吾學編



靖江安肅王神道碑銘

蔣 冕

冕嘗讀兩漢書見其所列同姓諸侯王數百而大雅不羣有若河間獻王德爲善最樂有若東平獻王蒼僅一二見豈生長富貴而有德以將之世固難其人哉此見於 靖江安肅王之薨其嗣王來請銘王神道之碑不能無慨言者也靖江雖僻在一隅去京師數千里而自疏封以來奕葉相承父祖子孫世忠信奉法循理切切以驕奢淫泆爲我戚非有慕於河間東平之大雅樂善而能若是哉王自正德戊寅始膺封爵嘉靖乙酉三月 日遽以疾薨在位僅八年

壽三十有三其善美見於事行者雖未足以充其所  
存而仁孝誠敬恪遵 祖訓懦懦然惟恐有違也不  
以其累世先王先王宏規懿範足以垂裕於後而有  
所持循也乎我 高皇帝大封同姓之初以 皇兄  
南昌王之子前大都督諱文正未封而沒也特封其  
子爲靖江王 賜名守謙一切 恩數與夫官屬規  
制槩與秦晉楚屬諸藩等蓋都督少孤母王守節依  
帝居止 帝事之甚謹撫都督愛逾已子故雖身後  
恩禮有加焉載在 國史可考也 靖江王一傳其  
子悼僖王再傳其孫 莊簡王莊簡生 懷順王懷

順生 招和王招和生 端懿王懷順王之曾祖招  
和端懿則王之祖若考也母妃楊氏兄弟七人王爲  
之長以弘治癸丑 月 日生於寢宮上距南昌九  
代矣王緯經扶生而穎異不凡年甫八九端懿疾委  
以國多事已一一區畫有條年十二 勅掌國事賜  
一品服逮襲爵後日益老成慎重事無小大動遵成  
憲自建藩至今宗室繁衍凡其事相接其於尊卑等  
差與夫稱謂拜揖之間未嘗一愆於度歲時有事宗  
廟必竭誠盡敬特帛非躬親省視不及以獻拜稽灌  
奠儼乎 祖考臨之在上於奉祀山川亦然性尤克

孝 懷順王妃谷氏薨王以曾孫代 端懿王主祭

自始事至卒事舉無違禮發引日徒步送至墳所中途有勸其登輿者卻之且曰送死大事敢憚勞乎及後日端懿王與母妃楊氏相繼以疾而薨王於父母之疾也晝夜躬侍湯藥未嘗離側或中夜焚香籲天誠意懇到及其薨也旦夕哀毀幾無以爲生有人所甚難者平居喜學問審理周世質而有文日必延之講究經史改容禮貌稱之爲先生而不名讀書之暇隨筆作詩文皆有關於身心倫紀不爲無益語嘗於宮中獨秀山間鑿石爲盂以盥手而銘之以著自新

之義又爲敬義箴皆刻之於石山之勝處時登眺焉  
興之所至輒形於詩長篇短章多至數十首間與儒  
生遊岳洞間商略名之曰樂天洞曰潛修又於山之  
左右豎二綽楔而以報國思親扁焉凡此皆足以見  
其志之所存矣國中山場土田所入茂有常數先是  
或不計豐歉而斂之至有破家不能償者王始因其  
豐歉而增損焉遇歉率量減其人數終王之世人蒙  
其惠心雖慈仁用法不私於近習嘗愛一善書者遇  
有吟咏輒命之書後其人欺誑事敗卒置之於法不  
少貸性明達前半歲預製棺斂之具屬續三日前設

飲饌與宮眷訣別下至內使宮人皆有賚於疎戚重  
輕錙銖無爽愛嗣王雖篤而教之必以義方將易箠  
猶呼至膝前丁寧教戒至於忠君愛親讀書好禮寬  
罰卹衆事言之尤力其神爽不亂如此訃聞 皇上  
嗟悼輟視朝遣行人傳鶚 諭祭自聞喪至祥禫凡  
十有四 命有司營葬事 賜諡安肅所以 寵卹  
之者甚厚以薨之年十月 日奉葬堯山世墓之次

焦太史編輯國朝獻徵錄卷之二終